

M107G: Heinrich: 'Litanei' (G)

0,0 Letania .
0,1 Hercen scowaere .
0,2 uor dem des muotis sagiraere .
0,3 siniu tougen nie ne mach uersperren .
0,4 nieht ne la mir giwerren .
0,5 mine manege missitat .
0,6 so ne wurde min nie mer dehein rat .
0,7 du wellest mich feste machen .
0,8 der lib ist ce fleischlichen sachen .
0,9 weich unde ovhaltich .
0,10 so bist aue du herro so gwaltich .
0,11 daz du in wol gisterchin maht .
0,12 mit diner gotelichin chraft .
0,13 ein champh han ich inphangen .
0,14 daz ist ienoch unergangen .
0,15 daz an mir z allen stunden .
0,16 die tugent habint mit den sunden .
0,17 warer schirmaere .
0,18 du wis der uoruehtaere .
0,19 uuor die tugentlichen schare .
0,20 daz si uon dem herzen uertriben algar .
0,21 der sunden bligine maesse .
0,22 so wirt der sin waesse .
0,23 uon dir ce uernemene unt ce redene .
0,24 du gib uns herre uater uergebene .
0,25 daz uns ce dem libe unt z er sele gifrume .
0,26 unt gibiut dinem einbornen sune .
0,27 daz er uns sende sinen trostgeist .
0,28 also du unser angist uil wol weist .
0,29 unser brode diu ist so michil .
0,30 daz wir schiere werden biswichin .
0,31 iz ne stuonde an sinir milte .
0,32 daz er mit sinem urideschilte .
0,33 uns bihuotte in disem wige .
0,34 unze wir nach disem libe .
0,35 emphahen den himiliskin lon .
0,36 dar umbe spriche wir Kyrie Eleyson .
0,37 An dir ewigir uater stet der gwalt .

0,38 des werch die sint manichvalt .
0,39 der schaffit unde antreitet .
0,40 der uuogit unt cileitet .
0,41 der zimbrit unt zebrichit .
0,42 der entlibit unde richit .
0,43 der heiligit unt uerdamnot .
0,44 er storet unde samnot .
0,45 er zurnet unt uergizzit .
0,46 er slehet unt uermisset .
0,47 er wundet unde heilet .
0,48 er gihaltet unde teilet .
0,49 er git unt inzuchit .
0,50 er hohit unt uerdruchit .
0,51 er hat alliz daz wol uur braht
0,52 des du uon aneenge hiete gidaht .
0,53 also der din uorsichtige wistuom .
0,54 daz ist din ebenewiger sun .
0,55 dir gap uolleist unde rat .
0,56 der ouch maniger slaht namen hat .
0,57 die wolt ich gerne chuonden .
0,58 gitorst ich uor minen sunden .
0,59 wan daz ich des guoten trost han .
0,60 iz meg mir wol alsam irgan .
0,61 also du hast gisprochin in dem wissagen .
0,62 swer sich zu dir welle gihaben .
0,63 ist er uon sunden swarz warden e .
0,64 du machist in wiz sam ein sne .
0,65 der selber gnaden bir wir uon dir gwis .
0,66 pater de celis .
0,67 Er heizzit din wart unt din gibot .
0,68 warer mennisch unt warer got .
0,69 er heizzet wunderlichir ratgebe .
0,70 lebentigiz prot wareu winrebe .
0,71 starchir got fuorste des frides .
0,72 orthabe des libis . uaener des siges .
0,73 er heizzit berch tal unde wech .
0,74 pruke . stege und stech .
0,75 engil wissage unde ewart .
0,76 leu ein brunne unde liebart .
0,77 are chalp unde lamp .
0,78 er heizzit unser heil unt unser heilant .
0,79 unser suonaere .
0,80 unt unser mitilaere .
0,81 inzwischin dir herre uater unde uns .
0,82 daz sint die namen dinis suns .
0,83 nu eruulle du heiliger geist .
0,84 mit werchin daz du an den namen bist .
0,85 unt bidenche alle unser not .

0,86 du mit dinem tode unsern tot .
0,87 ciuuortist an dem stamme .
0,88 da mit uns in disem wuotchlamme .
0,89 uerstiezze adames gitte .
0,90 daz uertiliete daz pluot daz uz diner sitte .
0,91 unde uz andern dinen wunden floz .
0,92 durch daz spreche wir Christe audi nos .
0,93 Heiliger geist warrer uogit .
0,94 den niemen wirdichlichin lobit .
0,95 du ne schephist dei wart in sinem sinne .
0,96 mit dem uiure diner minne .
0,97 alles guotis aneenge .
0,98 deu meil miner zungen du uerbrenne .
0,99 die deme hercen luterer sin benement .
0,100 ze sprechin dei wart dei dir gizement .
0,101 du heizzis wistuomis brunne .
0,102 ein sluzzil der barmunge .
0,103 der armen trostaere .
0,104 reiner hercen minnaere .
0,105 ein wech des ewigen libis .
0,106 ein march des himilischen stigis .
0,107 du biuoitist unt bisuonist .
0,108 du brennist unt chuelist .
0,109 du uiuhtist unt derrist .
0,110 du entsliuzzist unt sperrist .
0,111 du wonist unt fliuhist .
0,112 du sterchist unt schuohist .
0,113 du befridist unde behuotist .
0,114 du chuchist unde bruotist .
0,115 du entswebist unde wecchist .
0,116 du uertilist unt intecchist .
0,117 mit disen mislichin gaben .
0,118 solt du nach dinen gnaden .
0,119 unserm durren hercen geben .
0,120 dinen geistlichen regen .
0,121 dannen wir den wuochir megen gebern .
0,122 des wir sin ewichlichin irnern .
0,123 mit dinem uiure du irleuhte .
0,124 unt uerbrenne die uiuhte .
0,125 mennischlichir gluste
0,126 unde aller achuste .
0,127 so muog wir gireite .
0,128 in der rehten sichirheite .
0,129 sin des himilrichis gwis .
0,130 miserere nobis .
0,130a De sancta Maria
0,131 Liechteu magituomis gimme .
0,132 der engil uuorstinne .

0,133 phalnze des himilis .
0,134 gimahile des ewigin chunigis .
0,135 du bist diu bislozniu borte .
0,136 uon der der wiossage horte .
0,137 do im der engil ceigete ein gotishus .
0,138 er sprach . "her in sol werden unde hin uz .
0,139 unserm herren ein frigi uart .
0,140 unde sol diu borte iemer sin bispart ."
0,141 diu bicheichint dich unt dinen sun .
0,142 der den ewichlichin magituom .
0,143 nach der giburt bihielt sam ouch e .
0,144 du bist uon der wurcen iesse .
0,145 ein gerte uz irsprungen .
0,146 deu den bluomen hat gwunnen .
0,147 uon dem der waz chumit aller gnaden .
0,148 uns allen die do lagen
0,149 in der wuoste der sunten unberhaft .
0,150 din wuochir uowe hat uns widerbraht .
0,151 ce dem wuochir allir tugende .
0,152 des wis an mir gihugende .
0,153 muoter der barmunge .
0,154 diu uorder missehellunge .
0,155 ze der uns daz eriste wip frumete .
0,156 ienoch si unceuuort stuonde .
0,157 die die engil heten uf die menniskeit .
0,158 wan durch dinen trost wariu mait .
0,159 wir lesen uon dinen uordern .
0,160 daz ist an der scrift unuerborgen .
0,161 swanne die engil ceigen sich in giruohten .
0,162 daz si ir uoosze dar umbe suohten .
0,163 daz hast du gibezziert alliz .
0,164 also der guote sant iohannes .
0,165 ce troste scribit uns allen
0,166 do er dem engil ce uooszen wolt uallen .
0,167 der in die gotis tougen lerte .
0,168 daz er sich uon im sa cherte .
0,169 er sprach bewar daz du sin nie ne tuost .
0,170 unsern herren einen du ane beten muost .
0,171 ich pin ein ebenschalch diner .
0,172 unde ander chnehte siner .
0,173 Solher gnaden bist du orthabe .
0,174 unde waere ich herre denne ein wissage .
0,175 olde waere sin geist in minem munde .
0,176 dannoch ne machte ich noch ne chunde .
0,177 dich giloben als ich solde .
0,178 wer mohte dem giliutertem golde .
0,179 daz chopher glichen .
0,180 doch sehe wir taegilichen .

0,181 daz diu rose wachse uz dem dorne .
0,182 sam lobe wir dich giborne .
0,183 uon der bittern iudischefte .
0,184 deu mit grozzem unrehte .
0,185 ce den citen biuangen was .
0,186 do du rehte sam ein liehtfaz .
0,187 schine uber alle uinster .
0,188 sam der sunne durch daz glasuenster .
0,189 derliuhtet den tuncheln sal .
0,190 sam taete du die werlte ublich .
0,191 wir cellen dich c einem garten .
0,192 giceichenten unt bisparten .
0,193 da der boum inne wuhs .
0,194 uon dem uns des hungers wart buoz .
0,195 den uns unser uordern .
0,196 e diu heten erworben .
0,197 mit lasterliche gitte .
0,198 nu du wariu margarite .
0,199 aller himilchore .
0,200 nu wasche mich mit dem trore .
0,201 da dich der heilige geist mit bigoz .
0,202 do er dich dem gotissun c einer muoter chos .
0,203 du bist gisegenit uor allen wiben
0,204 wande du eine mahtist uertriben
0,205 uon uns den ewigen tot .
0,206 du bist der uf stende morgenrot .
0,207 erweltiu sam der sunne .
0,208 schone sam diu maeninne .
0,209 eislich sam diu giwaeffente schare .
0,210 wan du dem gotissun ein gare .
0,211 gaebe uz diner wambe .
0,212 da er unser uiande .
0,213 inne giwaltichlichen eruaht .
0,214 nu man du sine maginchraft .
0,215 daz er mich uor den sunden biware .
0,216 daz ich niemer so ne giuare .
0,217 ich ne gniezze diner giburte .
0,218 ce siner gegenwurte .
0,219 Tohter dauidis .
0,220 wech des ewigen libis .
0,221 irrituomis ende .
0,222 todes urstende .
0,223 lebendigu brunnader .
0,224 uz der diu runse floz aller gnaden .
0,225 wurze aller guote .
0,226 uon der der ast erbluote .
0,227 der sich witen hat gibreitet .
0,228 unde sinu zwi gileitet .

0,229 uon der erde durch die himile .
0,230 unt uon dannen her widere .
0,231 durch daz inner abgrunde .
0,232 daz er die striche miner sunde .
0,233 gnaedichlichin enbinde .
0,234 daz gibiut du frowe dinem chinde .
0,235 wande du maht ieweder tuon
0,236 gibieten sam diu muoter uber ir sun .
0,237 unde salt iedoch bitten unde eren .
0,238 sam diu suozze diu ir herren .
0,239 daz er gihuge aller dinge .
0,240 die er mit dir durch die suntaere bigienge .
0,241 Frowe ich dir dine ere da mite nit ne breche
0,242 daz ich dir so verre zuo spreche
0,243 wande daz du gischaft den schephaere .
0,244 dv tohter den uater gibaere .
0,245 wer maechte ane got des haben gidaht .
0,246 unde also der tot was braht .
0,247 aller der werlte uon einem wibe .
0,248 sam muose ce dem ewigen libe .
0,249 ein wip uns wider bringen .
0,250 nu habe wir einen bezzern gidingen .
0,251 danne ob adam waere gistanen .
0,252 wir ne durffin sinen ual niemer ganden .
0,253 noch sinis wibis missitat gichlagen .
0,254 wir ne phahen mere denne wir uerlorn haben .
0,255 si braht den tot . du daz leben .
0,256 si den fluch . du den segen .
0,257 si die armuot . du den richtuom .
0,258 sie die schalcheit . du den frituom .
0,259 daz giuuorre ubertrifft unsern scaden .
0,260 nun ist sin not nie mere des wir chlagen .
0,261 wan daz si daz paradyse hat pislozzen .
0,262 da wider machist du den himel offen .
0,263 unt uersperrist uns die helle .
0,264 ein bezzir dinch ich ienoch celle .
0,265 ce diu daz niemen in den sunden durffe ligen .
0,266 der mennisch hat den engil ubirstigen .
0,267 frowe mit dinis sunis menniskheit .
0,268 des si im unt dir giseit .
0,269 lob unt ewigiu gnade .
0,270 nu ceuore chuniginne die lage .
0,271 der mich die tieuel nicht erlazzent .
0,272 die mir den wech uersazzent .
0,273 den ich ce dem rehte solde gan .
0,274 de ist min meistiu angist die ich han .
0,275 wan daz ich wol weiz daz min zuouersicht .
0,276 diu ne uerlat mich trut frowe niht .

0,277 du ne gihelfist mir etlichir frist .
0,278 umbe den der din sun unt din uater ist .
0,279 nach sinen gnaden warer buozze .
0,280 daz ich an dem rehten erschinen muozze .
0,281 so ich ce siner gegenwuorte chume .
0,282 so bitte den uater unt gibiute dem sune .
0,283 gihugen an die muo dine .
0,284 da nach tusint chindiline .
0,285 die wurten erslagen uon herode .
0,286 daz er mich uon dem ewigen tode .
0,287 des tages bineme durch die dine minne .
0,288 daz ich nach minen notdurften gwinne .
0,289 des liehtes etilichin teil .
0,290 daz mir unt aller werlte uon dir erschein .
0,291 Noch bitte wir dich himiliskiu urowe .
0,292 du uon des heiligen geistis uiure unt uon sinem towe .
0,293 wurde gotilichin baerich .
0,294 sin wuochir daz was saelich .
0,295 do du ane mannes chunde .
0,296 solhis wonders an dir enstuonde .
0,297 daz der nature was ungwonelich .
0,298 des muost du iemer sin lobilich .
0,299 aller gotis gischefte .
0,300 deu in des tieuels zoumhefte .
0,301 uon rehte iemer mere waere .
0,302 wan durch den sun den du gibaere .
0,303 o wi wunderlichiu chintraht .
0,304 du hiete wariu mait dir gidaht .
0,305 e willichlichen ersterben .
0,306 e du iemer muoter woldest werden .
0,307 nach mennisklichim sitte .
0,308 o wie rehte wol du sin inbitte .
0,309 der dinis muotis feste .
0,310 so rehte wol an dir weste .
0,311 er machit dich ce muoter ane man .
0,312 der nie daz insigil inkan .
0,313 diner maitheite .
0,314 wir sprechin die warheite .
0,315 ce dinem lobe wariu mait .
0,316 als uns diu buoch habent giseit .
0,317 din wambe in gaerlichin bisloz .
0,318 der so michil ist unt so groz .
0,319 daz er alle die himile .
0,320 hat ce sinem gisidile .
0,321 c einem uuozscamel die erde .
0,322 nu bit wir in daz er werde .
0,323 gnaedich allen den dinen .
0,324 unde swenn er uns . sul erschinen .

0,325 an dem iungisten urteile .
0,326 daz wir sin in dem heile .
0,327 daz uon dir aller der werlte braht wart .
0,328 des tagis si uns diu helle bespart .
0,329 daz himilriche entslozen .
0,330 so hab wir allereriste wol gnozen .
0,331 diner muoterlichin guote .
0,332 wariu uogitinne nu bihuotte .
0,333 dine scalche hie unde ouch da .
0,334 sancta maria .
0,334a De Angelis .
0,335 Gotis ercengil here .
0,336 mit iuwerm uaener sant Michele .
0,337 unde ir niune chore alle .
0,338 die nach des tiufils ualle .
0,339 mit got staetichlichen bliben .
0,340 nu helfit uns daz wir gisigen .
0,341 an dem slangen urmaeren .
0,342 der mit sinen uolgaeren .
0,343 hie beuor wider iuch uaht .
0,344 uil bloede was diu sin chraft .
0,345 do in der uberwant .
0,346 der iuwer chemphe ist gnant .
0,347 des lobit ir got uber al .
0,348 uil michil wart der sin ual .
0,349 in die ewigen riuwe .
0,350 o wi sin gittigiu chiuwe .
0,351 wie manigen si noch uerslunte .
0,352 wie manigen er uberwunte .
0,353 wan durch den trost den wir uon iu haben
0,354 also wir sante Paulen horen sagen .
0,355 er spriche . daz sumiliche geiste sin dar zuo irchant
0,356 die dem mennicken ce dieniste werden gisant .
0,357 die daz erbe suln emphahen
0,358 des waren heilis unt der gnaden .
0,359 daz uns sin honchust binam .
0,360 do im der erist mennisk wart gihorsam .
0,361 daz der mennisk daz wider gwinne .
0,362 des helfet uns durch die minne .
0,363 da mit unser beider uientschaft .
0,364 ce rehter suone habe braht .
0,365 ane iuch ne machte wir niht gnesen .
0,366 wande wir haben waerlichen gilesen .
0,367 daz nehein christenmennisk hiute ne lebet .
0,368 sin en werde uon iuwer etlichem giphleget .
0,369 wande diu broede diu ist an unserm fleische .
0,370 daz wir unser christenliche giheizze .
0,371 got niemer . ne machten gileisten .

0,372 iz ne waere daz ir geiste wider den geisten .
0,373 uns hiette in iuwer huotte .
0,374 nu ir engil saelige unde guote .
0,375 impelhit uns got mit iuvern digen .
0,376 daz wir mit iuvern helfen gisigen .
0,377 in disem zwiuilichem wige .
0,378 des wir in disem libe .
0,379 niemer werden uerlazzen .
0,380 der tieuel uar uerwazzen
0,381 ir gistet uns z allen citen bi .
0,382 omnes sancti angeli .
0,382a De sancto IoHanne baptista .
0,383 Saemiliche gnade .
0,384 uorder wir leider trage .
0,385 daz machint unser schulde .
0,386 uon dir gimme unt ubergulde .
0,387 aller gotis trute .
0,388 o wi wie gerne ich dinen namen dutte .
0,389 ob ich sin wert waere .
0,390 der nam iohannes ce ware .
0,391 swer sin daz puch frage .
0,392 er dutet gotis gnade .
0,393 den namen hete dir dir engil erchennit .
0,394 nu du gotis gnade sist genennit .
0,395 nu gnade mir dinem chnehte .
0,396 ich da uon merrem rehte .
0,397 dich uor allen liuten loben sol .
0,398 hiete ich mine sele in daz gisol .
0,399 aller laster nieht uersenchit .
0,400 des sant Peter wol gidenchit .
0,401 da er den suntaere biwart .
0,402 swann er chumit in die rehten uart .
0,403 daz er sin achust uerlat .
0,404 unde si aue dar nach bigat .
0,405 er sprichit . er tu rehte sam der hunt .
0,406 der sine spie nimit wider in den munt .
0,407 dem mag ich wol glich sin .
0,408 er sprichit . der tu ouch rehte sam daz swin .
0,409 daz sich mere unsubstirch mache .
0,410 swenn iz in der horlacchen .
0,411 lit ce diu daz iz sich wasche .
0,412 o wi ich stoubigir asche .
0,413 ich flohzunder ualwisch .
0,414 ich pin warden sam einer boeser uisch .
0,415 uon den sunden durchgraete .
0,416 ich pin rehte alsam staete .
0,417 sam uor der wints prut daz mel .
0,418 oder sam uor dem isen ist daz eigeruel .

0,419 ich prustigiz hauenschirbe .
0,420 waz ob ich morgen stirbe .
0,421 dem ich hiute pin gnaeme .
0,422 dem pin ich danne widerzaeme .
0,423 ich uil stinchundiz as .
0,424 ich spriche sam der rabe cras cras .
0,425 Daz chiut . morgen morgen .
0,426 daz wil ich gerne bisorgen .
0,427 daz ich got rehte gituo .
0,428 wer git mir frist unze fruo .
0,429 ob ich iz hiute uf schiube .
0,430 o wi wie dicche ich erleuge .
0,431 swaz ich gote giheizze .
0,432 der sunten madewelligen eizze .
0,433 die habint mine sele uerderbit .
0,434 unde habint mich alsam lazaru- ersterbet .
0,435 mine gwizzen harte mir eruuolit .
0,436 wan daz mich uf sulit .
0,437 der gotis touffaere .
0,438 min einiger helfaere .
0,439 din wunderliche irbarmede .
0,440 an alle mine gaernde .
0,441 sit ich armer mennisk hilflos .
0,442 dich c einem helfaere erchos .
0,443 sit han ich mich des wol uerstanden .
0,444 du hiete mich e in dinen handen .
0,445 daz solt du ouch noch bihalten .
0,446 wande woldist du mich engalten .
0,447 maniger gachschrice .
0,448 da mit mich dicher denne diche .
0,449 der tieuel hat uerleitet .
0,450 so waere mir manigen tach gireitet .
0,451 diu ewige uerdammunge .
0,452 daz sol din barmunge .
0,453 schaffen alliz anders .
0,454 herro sant Iohannes .
0,455 Etwer mach mir nu uuor celn .
0,456 wie ich dich ie gitorste erweln .
0,457 c einem uogit suntibaere .
0,458 durch daz ich ein suntaere .
0,459 unt leider ein uerwarhter mennisk bin .
0,460 dem wil ich offen minen sin .
0,461 den ich mit der warheit wol biwaere .
0,462 wande du gotis touffaere .
0,463 pist herre denne aller mennisk chint .
0,464 die uon wibis giburte chomen sint .
0,465 ane der engil chuniginnen .
0,466 uon diu so muoz ich mich uersinnen .

0,467 du bist ouch gnaediger denne ir deheiner .
0,468 uon diu so han ich unreiner .
0,469 ich hazzigir . ich nidiger .
0,470 ich zornigir . ich girigir .
0,471 ich uobils schuntaere .
0,472 ich des tiuails wuochiraere .
0,473 ich aller laster herhorn .
0,474 ich han dich gotis uaener irchorn
0,475 mir einigem dich einigen .
0,476 dich erwelten unde dich heiligen .
0,477 dich guoten unde dich gnaedigen .
0,478 dich suozen unde dich saeligen .
0,479 dich semften unde dich linden .
0,480 ane wem mag ich nu uinden .
0,481 so maniger slaht guote .
0,482 swen ich ce miner armuote .
0,483 uz allen choren het erwelt .
0,484 da waerest du doch ce dem uorderisten gicelt .
0,485 du waere ein engil die wile unt du lebetest .
0,486 do du ouch des amptes der wissagen phleitest .
0,487 der eren bist u ouch nu niht bistozzin .
0,488 den patriarchen muozze wir dich gnozen .
0,489 den zwelfpoten alsame .
0,490 unter den martyraeren ist der din name .
0,491 der alleruorderiste ce ware .
0,492 dich lobint die bihtaere .
0,493 dir entwichint die einsidile .
0,494 dich eren die magede dar en himile .
0,495 solech ist din lon unt din ere .
0,496 nu hilf mir heiliger herre .
0,497 daz ich dich in den tugenden noch gisehe .
0,498 unde swenne ich uogit uf dich gehe .
0,499 ane miner hinuerte .
0,500 so uertribe dinis gwaltis gerte .
0,501 den tieuel uon dinem chnehte .
0,502 daz er mich iecht ane uehte .
0,503 olde schuldigen bringe .
0,504 ce dem gotis teidinge .
0,505 wider du min uorspreche wis da .
0,506 sancte IoHannes baptista .
0,506a De Apostolis .
0,507 Petre der zwelfpoten fuorste .
0,508 du bidenche aller unsir durfte .
0,509 die weist u allerbeste .
0,510 uf den diu gruntfeste .
0,511 wart der christenheit gileit .
0,512 deu uon den torn der helle nie ne werde beweit .
0,513 wir wizzen wol heiliger herre .

0,514 daz diu suntige sele .
0,515 uil harte dir erbarmet .
0,516 des wurte du wol gwarnet .
0,517 bi dem lougen daz du gotis taete .
0,518 dri stunde uor hancraete .
0,519 umbe den du sit wurde erhangen .
0,520 uon dem hast du nu enphangen .
0,521 die sluzzil der himilischen borte .
0,522 die mahte du wol mit dem gotisworte .
0,523 swem du wil entsperrent unt entsliezen .
0,524 nu laz uns des gniezen .
0,525 des er dich selbe lerte .
0,526 swenne der schuldige man sich picherte .
0,527 du soldest im uergeben sine unde .
0,528 siben unde sibenzich stunde .
0,529 paule meister der diete .
0,530 uernim daz gibet daz dir biete .
0,531 din armiu christenheit .
0,532 an der din arbeit .
0,533 groz wuochir hat irworuen .
0,534 umbe die du taegiliche sorgen .
0,535 hiete in disem lebene .
0,536 wir hieten iemer uon dir ci redene .
0,537 welech ein gotis wuochiraere .
0,538 uor allen heiligen du waere .
0,539 des ne mach si niemen zu dir gimazzen .
0,540 nu ist dir der selbe gwalt uerlazen .
0,541 den sant peter din giselle hat .
0,542 daz er den suntaeren die meintat .
0,543 mugit bihaben olde uerlan .
0,544 nu sult ir daz pezzet bigan .
0,545 an iuwer undertanen .
0,546 dar under ne mug wir uns ouch ganen .
0,547 der helffe ander iuwer gisellen .
0,548 ir sult uns nach gnaden uor stellen .
0,549 swan ir uor gotis gisihte .
0,550 besizzit daz girihte .
0,551 der iungisten schidunge .
0,552 diu ane barmunge .
0,553 irget nihtwar nach rehte .
0,554 so bischirmit iuwer chnehte .
0,555 uor allem dem dinge unt uns scade si .
0,556 omnes sancti apostoli .
0,556a De martyribvs
0,557 Suzzer uoruehtaere .
0,558 aller gotis martiraere .
0,559 du den eristen uanen huobe .
0,560 unde in uf die martyr truoge .

0,561 da du mit den steinen wurd erslagen .
0,562 wir horen dei buoch uon dir sagen .
0,563 du erchuhst sibem toten .
0,564 uz alsamelichen noten .
0,565 erledige herre sant Stephan .
0,566 beidiu wip unde man .
0,567 swer an der sele uerscheiden si .
0,568 unde ouch du sant Laurenti .
0,569 du da wurde gibraten uf dem roste .
0,570 chum uns armen ce troste .
0,571 mit allen dinen gisellen .
0,572 die ne mohte wir niemer gar gicellen .
0,573 doch scul wir iuch alle des piten .
0,574 sam ir den tieuel habit ubirstriten .
0,575 mit der martyr iuwers libis .
0,576 sam muoz wir geistlichis wigis .
0,577 mit iuwern helfen an im gisigen .
0,578 uor dem uns daz cruce sol bifriden .
0,579 daz uns got heizzit tragen allertaegilich .
0,580 daz ist ce ware so umuertraegilich .
0,581 an swem er des innen wirt .
0,582 daz ist der eine den er uerbirt .
0,583 daz habit ir uns wol gitragen uore .
0,584 nu leitet uns in daz selbe uuoospor .
0,585 des bite wir suntaere .
0,586 iuch heilige martiraere .
0,586a De confessoribus .
0,587 Nu bite wir dich sant Gregori .
0,588 daz uns din helfe mite si .
0,589 du da hie biuor waere .
0,590 des heiligen geistis chamiraere .
0,591 do er dir giruhte erougen .
0,592 den scaz sinir tougen .
0,593 also wir an diner uita haben iruunden
0,594 daz er dir giruhte z allen stunden .
0,595 in einer tuben bilde erschienen .
0,596 er saz uf den ahseln dinen .
0,597 z aller diner tihte .
0,598 wir nesten ienoch an diner scrifte .
0,599 daz er dich waerlichen lerte .
0,600 ich waen er ie iemen so grozlichin gerte .
0,601 nu hilf dinir armen diete .
0,602 saemilichis trostes den du hiete .
0,603 uon siner barmunge .
0,604 ce solher uorderunge .
0,605 wese din giuerte .
0,606 der guote sant merte .
0,607 der drie toten erchuhte .

0,608 unde aller slaht gisuhte .
0,609 daz ie iemen gwar .
0,610 daz uetreib er al gar .
0,611 der im gab die ere .
0,612 der erchuche den tot unser sele .
0,613 wande doch iuwer hinuart .
0,614 wurde gnaedichlichin gispart .
0,615 in den christenlichin fride .
0,616 doch pirt ir sumiliche uon dem sige .
0,617 der martyraere ungischeiden .
0,618 der mug wir ouch einen ceigen .
0,619 den heiligen briester Ieronimum .
0,620 der was ein schellundiz organum .
0,621 unde ein phiphe des heiligen geistis .
0,622 wande swaz wir liebes unde guotis allermeist .
0,623 uon got gilesen unde gihorte haben .
0,624 des sul wir allermeist danch sagen .
0,625 gotis gnaedicheit .
0,626 unde sinir arbeit .
0,627 Jeronime uil milter man .
0,628 nim zu dir die ich ginennit han .
0,629 die heiligen bihtaere unde bite .
0,630 daz got tugintliche site .
0,631 unde solhen glouben an uns feste .
0,632 dem guoter werche nie ne gibreste .
0,633 unze wir disen lip uerenden .
0,634 des welle wir iuch ce boten senden .
0,635 an dem wir grozzis trostes birn gwis .
0,636 orate p nobis .
0,636a De virginibvs .
0,637 Agnes heiligi magit .
0,638 z unsern helfen wis giladit .
0,639 du die werlte fruo uerliezze .
0,640 unde dinen magituome gihiezze .
0,641 dem waren briutegoume .
0,642 so ueste was din gloube .
0,643 uur daz du in ce trute erweltest .
0,644 daz du der werlte uf seltest .
0,645 alle die ere die si hat .
0,646 du uermantist chunichliche hirat .
0,647 der tieuel muose din leit rechen .
0,648 er cibrach den der da cibrechen .
0,649 wolte dine maituomeliche schame .
0,650 der ne uuorte nihtwar den tot dane .
0,651 den chuhtest du frowe mit dinem gibete .
0,652 daz waene ie dehein mere gitete .
0,653 du ginaeme den ende uon einem swerte .
0,654 do dich unser herre got giwerte .

0,655 einer zwispilden stole .
0,656 nu erledige uns armen uz aller chole .
0,657 des ewigen flornes .
0,658 daz wir des gotis zornes .
0,659 rache ieht erarnen .
0,660 diu da was ergan uber disen armen .
0,661 des wese din uolleist da ce himile .
0,662 diu guote sant cecilie .
0,663 diu sich uzzin cierte mit golde .
0,664 unt truoch dar under uerholne .
0,665 ein haerine hemedede .
0,666 da mit si dem tieuel machit fremede .
0,667 alle ir guotaete .
0,668 o wi welhir wunder ein wibilichir staete .
0,669 si hete ir maitheite .
0,670 uon gotis gnedicheite .
0,671 ein starchiz widerwette .
0,672 do si gitorste an ein bruttebette .
0,673 chomen mit dem manne .
0,674 der ir gigert hete lange .
0,675 dem droute si den gotis slach .
0,676 ob er ir deheiner slahte ungimach .
0,677 mit iehte gitorst erceigen .
0,678 starche eruorhte daz der heiden .
0,679 ich wil sprechen also daz puoch sait .
0,680 der wider dich heiligiū mait .
0,681 sam ein scherfer leu was ergramt .
0,682 den machist du semfte sam ein lamp .
0,683 uon dem pabes vrbane .
0,684 ward er sinen sunden ane .
0,685 in dem toufflichin brunnen .
0,686 da wold im got des gunnen .
0,687 daz er den heiligen engil bi dir uant .
0,688 der braht iu beiden in siner hant .
0,689 zwene chrenz giulohten uz den bluomen .
0,690 die in dem paradyse chunnen gruenen .
0,691 iemer mere an unterlaz .
0,692 die brahten iu beiden guoten waz .
0,693 sam ir waert in dem paradyse .
0,694 unde gaben iuwer sele solhe spise .
0,695 daz si iuch uf die martyr frumete .
0,696 nu bite umbe unser sunde .
0,697 du unt diu guote sant agne .
0,698 daz wir ieht ce lange .
0,699 in unsern achusten ligen .
0,700 wir ne muzzen dem tieuel an gisigen .
0,701 unde sinen uolgaeren .
0,702 des helfit uns suntaeren

0,703 ir frowen beide .
0,704 unt alle gotis meide .
0,704a De omnibus sanctis .
0,705 Alle gotis heiligen .
0,706 beuelhet uns got mit iuvern digen .
0,707 der broede ir wol erchennit .
0,708 ir alle die da sin ginennit .
0,709 an des ewigen libis puoche .
0,710 die gnade die da z iu suoche .
0,711 iuwer armiu diet .
0,712 ir uerseit uns niht .
0,713 daz der ware gotis sun .
0,714 doch wir z unwirdiclichin tun .
0,715 unser gibet erhore .
0,716 des helfit uns engilische chore .
0,717 patriarche unde pphete .
0,718 unde alle die iungir die got hete .
0,719 unde die unser rihtaere sulen sin .
0,720 unde diu gimaroten chindelin .
0,721 cehencich uiercich unde uier tusedent .
0,722 unt alle die die ir sunde habint biriusent .
0,723 in diser werlte die wile si lebeten .
0,724 unde die heligen muniche die des phlegeten .
0,725 daz si dei laster an in sluogen .
0,726 unt christis ioch uf in truogen .
0,727 unt die rehte einsidile hiezzen .
0,728 die allen den trost liezzen .
0,729 der in uon der werlte mahte bichomen .
0,730 mit den die engil dicche giruohten wonen .
0,731 unde die rehte witewen waren .
0,732 unt da mit ewichlichen gnaren .
0,733 olde die diu eliche hirat .
0,734 hin ce got braht hat .
0,735 unde ir alle saelige sele .
0,736 die uon dem eristen heiligen abele .
0,737 unz an disen tach dar chomen birt .
0,738 da iu der himilische wirt .
0,739 lonet nach iuwerm gidinge .
0,740 mit einigem phenninge .
0,741 er ce prime olde ce none .
0,742 in dem wingarten frone .
0,743 dar uffe habit gearbeitet .
0,744 daz ir heim sit gileitet .
0,745 lat uns iu sin empholhen .
0,746 daz wir ieht werden uerswolhen .
0,747 uon des leiden tiuels chiuwen .
0,748 der umb uns wiruit entriwen
0,749 sam der leu ruhlunde . nach sant pauls rede .

0,750 unde suochit wen er uerswelhen mege .
0,751 Nie ne uersait uns iuwer giwegede .
0,752 daz uns armen erledige .
0,753 uon suntlichin banden .
0,754 uon wertlichen scanden .
0,755 uon totlichim sere .
0,756 uon uppigir ere .
0,757 uon zorne unt uon nide .
0,758 uon hazze unde uon girde .
0,759 uon der leidigin hochferte .
0,760 diu uns armen uerherte .
0,761 mit dem eristem manne .
0,762 in disem wuotchlamme .
0,763 uon unrethem gwinne .
0,764 uon uleischlichir minne .
0,765 uon huorlichir hitze .
0,766 uon des sinnis abwizze .
0,767 uon uientlichir rache .
0,768 uon spotte unde uon bispraechen .
0,769 uon lügen unt meinneiden .
0,770 unt uon allen dingen die uns scheiden .
0,771 uz dem himilriche .
0,772 des helfit uns alle gliche .
0,773 daz die got an uns uertigile .
0,774 unt daz er uns insigile .
0,775 mit dem sluozzil der minne .
0,776 diu ist ein chuniginne .
0,777 aller geistlichin gabe .
0,778 uon der chumit saelde unde gnade .
0,779 fride unde ebenhellunge .
0,780 milte unt barmunge .
0,781 chiusche unde reincheit .
0,782 gihorsam unde gidulticheit .
0,783 die lobit unser herre got .
0,784 do er wider siner iunger chot
0,785 "hoc est p-ceptu- meum .
0,786 minnit einander sam ich iuch tun ."
0,787 daz errechit gregorius allerbeste .
0,788 er sprichit daz alles guotis werchis este .
0,789 nehein gruone niemer mege gewinnen .
0,790 si ne wonen in der wurce der minne .
0,791 diu ne mach niender wesen eine .
0,792 ir ere hat si gimeine .
0,793 mitsamt der deumuote .
0,794 uon der chumit aller slaht guote .
0,795 alle tugintliche site .
0,796 unde elliu ere da mite .
0,797 triuwe unde warheit .

0,798 zuhte unde frumicheit .
0,799 mit disen tugintlichin scaren .
0,800 muoze uns got iemer biwaren .
0,801 unze wir dem tieuel an gisigen .
0,802 des helfit alle heiligen .
0,803 Nu scul wir dir herre .
0,804 biuelhen lip unde sele .
0,805 beidiu c em eresten unt ce lesten .
0,806 wande du allerbeste .
0,807 unser not unde unser angist weist .
0,808 an dir stet alzogis der uolleist .
0,809 swes so wir din heiligen haben gibeten .
0,810 die sol dine gnade an uns uertreten .
0,811 daz du durch ir willen .
0,812 muozzist gnaedichlichin iruullen .
0,813 swes so wir in dinem namen .
0,814 mit ir boteschefe gigert haben .
0,815 nu erledige dine chnehte .
0,816 uon allem unrehte .
0,817 uon geistlichir unzuhte .
0,818 uon scaden unt uon gisuhte .
0,819 uon din selbes zorne .
0,820 uon dem ewigin florne .
0,821 uon unreinen gidanchin .
0,822 uon den glugjuntent uanchin .
0,823 die daz fleisch hurlichin zuntent .
0,824 uon teuflichen sunten .
0,825 uor grozzer bichorunge .
0,826 uon der ewigen uerdammunge .
0,827 uon aller slaht leide .
0,828 unt an der wile so da sceide .
0,829 diu sele uon dem libe .
0,830 herre christ du uns entlibe .
0,831 durch die engilische boteschaft .
0,832 diu dinir muoter wart praht .
0,833 unt durch die touffe die du enphienge .
0,834 unt durch die uasten die du bigienge .
0,835 uns armen c einer lere .
0,836 unt durch dinis crucis ere .
0,837 durch dinir sele hinuart .
0,838 du da selbe ware daz ophir unt der ewart .
0,839 durch din urstende .
0,840 diu unserm tode gab ein ende .
0,841 durch diner ufferte signumft .
0,842 durch des heiligen geistis chumft .
0,843 chum uns armen ce heile .
0,844 an dinim urteile .
0,845 daz wir iecht erarnen des tages .

0,846 die rache des ewigen slages .
0,847 swer danne wirt gisceiden uon dinen chinden .
0,848 der ne mach niemer mere uinden .
0,849 uor dir deheiner slahte gnaden .
0,850 so suochet er leider ci trage .
0,851 wan ob iz sin maehte .
0,852 daz sin taegilichin gidaechte .
0,853 din muoter unt alle din heiligen .
0,854 im en wurte niemer uon dir entliben .
0,855 ubir in ist diu urteile gigegeben .
0,856 daz er iemer muz totlichin leben .
0,857 in diner agezel .
0,858 dem waere uil michil bezir .
0,859 daz er nie mennisk waere worden .
0,860 daz heiz uns e bisorgen .
0,861 lieber herre suzzer uater .
0,862 die wile du uns antlazzis wil gistaten .
0,863 so gib uns tuginlichin ci lebenne .
0,864 daz wir mit dinem uaeterlichin segene .
0,865 des tieuels uns irwerge
0,866 e er uns des richis mug enterben
0,867 daz uns din selbis tot intsloz .
0,868 te rogamus audi nos .
0,868a Communis .
0,869 Nu ist rehte unde bruoderlich .
0,870 daz wir umbe einander alle gimeinlich .
0,871 in der gotlichin . minne .
0,872 an die turringe .
0,873 dinir barmunge .
0,874 herre chunich aller chunige .
0,875 uil emcichlichen chlophin .
0,876 mit zaehlichen trophen .
0,877 daz du uns fride unt gisunt uerlihist .
0,878 unt unserm hercen nie ne uercihist .
0,879 des heiligen geistis gnade .
0,880 unde aller slaht lage .
0,881 unser uiede cestorest .
0,882 unde diner christenheit erhorest .
0,883 unt ir uaterlichin gnadist .
0,884 unt beschirmest unsern herren den pabes .
0,885 der uns alle sol bisorgen .
0,886 unde allen phaeflichen orden
0,887 machist einueltich .
0,888 an dinen giboten ehaltich .
0,889 unt giruochist alle christen .
0,890 ce dinem lobe ce staetigen unt ce fristen .
0,891 die du mit dinem bluote erlostest .
0,892 unt daz du die armen gitrostest .

0,893 machist gisunt die ungisunden .
0,894 irlosest die giuangen unt die gibunden .
0,895 unt giruochist die ellenden .
0,896 in ir uaterlant ci senden .
0,897 unt alle die uf wazzer uarn
0,898 uor allen freisen biwaren .
0,899 daz du chunige unde rihtaere .
0,900 unt ander ir uolgaere .
0,901 muzist du giuesten an dem rehten .
0,902 unt uerdruchist die wideruechten .
0,903 christinlichis glouben .
0,904 unde alle die offinlichin olde tougen .
0,905 mit fraefuele sunten oder mit uorhten
0,906 niene lazist werden die uerworhten .
0,907 si ne gibuzin in disem libe .
0,908 hungir unde bisez du uertribe .
0,909 diene der erde uon dem lufte .
0,910 daz wuocher citlichir gnuhte .
0,911 ceuuore aller slaht irrituome .
0,912 gib uns maezzigen richtuome .
0,913 unt dar uber nie mere .
0,914 unde lon uater herre .
0,915 mit dinem cehencichualtigem lone . gelte .
0,916 die uns in diser werlte
0,917 minnint . spisent . unde uazzent .
0,918 uergib allen den die uns hazzent .
0,919 die dinis glouben haben ueriehen .
0,920 gnade allen selen .
0,921 an ir hinuerte .
0,922 din stabe unt din gerte .
0,923 diu si nach der bete dauidis .
0,924 ein trost der sele unt des libis .
0,925 daz du mich giruochis ce bechleiben
0,926 mit dinis tiskis . aleibe .
0,927 unt mit dinem chelche trunchen machen .
0,928 er meinit mit den oberisten zwein sachen .
0,929 dinis lichnamen unt dinis pluotis .
0,930 want niemen tuot so uil guotis .
0,931 swer sich der uon scheidit .
0,932 im ne si uor dir uerteilet .
0,933 des ne la niemen wesen ane .
0,934 die uon dir herre christ cristiane .
0,935 mit dem namen unt mit den werchen sint .
0,936 samene iherre uater diniu chint .
0,937 in der himilischin Jerusalem .
0,938 der selben gnaden la niht bisten .
0,939 dinen scalch Heinrichen .
0,940 der uil harte einlichen .

0,941 sich dar uf gflizzen hat .
0,942 swer mit sinne dizze gibet uerstat .
0,943 swelhe gnade er da mit erwerue .
0,944 daz er der teilnumftich werde
0,945 dizze gibet heizzit letanie .
0,946 daz imphach du urowe sancta maria .
0,947 mit allem himilisken here .
0,948 daz uns got alles des gwere .
0,949 des [...] [...]